

“Datapuwa't magsilago kayo sa biyaya at sa pagkakilala sa ating Panginoon at Tagapagligtas na si Jesucristo. Sumakaniya nawa ang kaluwalhatian ngayon at magpakailan man. Siya nawa.”

2 Pedro 3:18

Bilang mga mananampalataya tungkulin natin na nasain ang mga bagay na makakatulong sa atin upang tayo ay lumago espiritwal, gaya naman ng isang sanggol na umiiyak at naghahangad na makalasap ng gatas, ito ay nakatala sa 1 Pedro 2:2 *“Gaya ng mga sanggol na bagong panganak ay nasain ninyo ang gatas na walang daya na ukol sa espiritu, upang sa pamamagitan nito'y magsilago kayo sa ikaliligtas;”*

Dahil dito ang kopya ng araling ito na pinag sama-sama at binigyan ng karagdagang pagdidiin at pagpapatibay ng mga katotohanan mula sa Banal na Kasulatan, sa pagsasanay ng ilang mga mahahalagang hakbangin tungo sa paglagong espiritwal upang bigyan tayo ng kaalamang maisagawa, at maituro din naman sa iba pang mga bagong mananampalataya.

Bilang Pastor, hangad ko na sa pamamagitan ng pagsailalim sa pagsasanay mula sa mga araling ito ay makaranas ang bawat isa ng pangunguna ng Banal na Espiritu, upang ihatid sa tamang kaunawaan at paglagong espiritwal, samakatuwid ay lubos na makaganap sa kalooban ng Diyos sa tapat na paglilingkod, sa ikaluluwalhati ng ating Panginoon Hesu Kristo at Tagapagligtas.

LAYUNIN

Ang pangunahing layunin ng araling ito ay madala natin sa paglagong ispiritwal ang mga bagong mananampalataya, upang lubos na maunawaan ang kalooban ng Diyos sa kanilang buhay, at lubusan itong maisakatuparan sa pamamagitan ng unti-unting pag hakbang tungo sa tapat na paglilingkod sa ating Panginoong Hesu Kristo na ating Diyos at Tagapagligtas.

Unang Aralin

**PAG-ANIB AT PANANAMBAHAN
SA TAMANG IGLESIA**

PANIMULA:

Maliwanag sa Banal na Kasulatan na ang paraan ng kaligtasan ay ating makakamtan sa lubos na pagtitiwala sa ginawa ng ating Panginoong Hesus sa krus ng kalbaryo, na Siya ay namatay, nailibing, at pagkaraan ng tatlong araw, Siya'y muling nabuhay para tubusin ang kasalanan ng lahat ng sumampalataya at nangagsisi at tanggapin si Hesus sa kanyang puso bilang Panginoon at Tagapagligtas ng kanyang kaluluwa.

Samakatuwid ang pag-anib sa iglesia ay hindi paraan ng kaligtasan, subalit ito ay dapat maganap sa lahat ng nakaranas ng kaligtasan alinsunod sa plano ng Panginoon sa lahat ng mga mananampalataya o nagsitanggap sa Kanyang mga salita. (Mga Gawa 2:41,47)

I. Ano nga ba ang ibig sabihin ng Iglesia?

A. Ito ay Hindi Relihiyon

Sapagkat hindi relihiyon ang itinayo ng Panginoong Hesu-Kristo. (Mateo 16:18)

B. Ito ay hindi isang Ordinaryong Gusali

Hinalintulad sa isang gusali, subalit ito ay ispiritwal na gusali na ang Panginoong Hesus ang Pangulong Bato, na nakalapat mabuti upang maging templong banal sa Panginoon. (Efeso 2:20-22, Mga Gawa 17:24)

C. Ito ay Kapulungan ng mga ligtas at nangabautismuhan.

“Ekklesia” – called out assembly

(Colosas 1:18, 1 Corinto 12:12-27, Mga Gawa 2:41,47)

D. Ito ay Katawan ni Kristo. (Colosas 1:18, 1 Corinto 12:12-27)

II. Mahalagang Dahilan ng Pagtitipon at Pananambahan

A. Sapagkat ito ang kalooban ng Diyos sa lahat ng mga mananampalataya (Hebreo 10:25, Mateo 18:20)

B. Upang ating sambahin ang Diyos sa Espiritu at katotohanan (Juan 4:24, Roma 12:1)

C. Makapagpapalakasan at makapagpapanalanginan tayo sa palagiang pagtitipon (Hebreo 10:24, Mga Gawa 2:42)

III. Palatandaan ng tunay na simbahan

A. Si Hesus ang nagtatag. (Mateo 16:18)

B. Kay Hesus nakatatag (Efeso 2:20)

C. Mayroong katiyakan ng kaligtasan (Mateo 16:18)

D. Mayroong tamang pananampalataya (Roma 10:17)

E. Pinanghahawakan ang kasaysayan, at katuparan nito sa Bibliya na hindi naputol ang doktrina, kasanayan, at ang pamamalagi ng iglesia mula pa sa pasimula magpakailan pa man.

Bagaman sa mga nagdaang panahon ay nakaranas ng matinding paguusig ang iglesia ng Panginoong Hesus, ito ay nananatili sa Kanyang pangangalaga gaya naman

ng Kanyang pangako dito, kaya't ito ay maingat na nakarating sa ating panahon. (Efeso 3:21, Gawa 2:42)

IV. Ano ang takdang araw ng pananambahan ayon sa Bibliya?

Ang mga sumusunod na talata ay nagbibigay linaw upang gunitain natin at bigyan ng halaga ang takdang araw ng pananambahan na pinasimulan ng mga sinaunang mananampalataya.

- A.** Ang araw ng muling pagkabuhay ng ating Panginoong Hesus (Juan 20:1,19)
- B.** Ang araw ng pagpapakita at pagbibigay ng Panginoon ng dakilang tungkulin sa Kanyang mga alagad (Mateo 28:17-20)
- C.** Ang araw ng pagtitipon ng mga mananampalataya at pangangaral ng salita ng Diyos ni Apostol Pablo (Mga Gawa 20:7)
- D.** Ang araw ng pagkakaloob ng kanilang mga tinatangkilik para sa gawain ng Panginoon (I Corinto 16:2)
- E.** Ang lahat ng ito ay unang araw ng sanglinggo na pinapatunayan lamang din sa atin na marapat unahin ang kaharian at kalooban ng Diyos (Mateo 6:33)

PAGTATAPOS

Marapat at mainam sa isang tunay na mananampalataya na maging kaanib ng tunay na iglesia samakatuwid ay ang “Iglesia Bautista” o Baptist Church, na itinuro ayon sa mga palatandaan ng Bibliya mula sa kanyang aral at mga kasanayan upang mapangalagaan at maging matatag ang ating pananampalataya at proteksyon sa ating pamilya.

*Ikalawang Aralin***ATING BASAHIN ANG BANAL NA
KASULATAN**

Sa pamamagitan ng pagbabasa ng Biblia, ang Diyos ay nangungusap sa atin, Dahil sa katotohanang ito, ang pagbasa ng Biblia ay dapat maging isang pamalagiang gawain ng lahat ng tao, lalo't lalo na ng mga tunay na mananampalataya.

I. Ang Kahalagahan ng salita ng Diyos

- A. Ito ay magtuturo sa atin ng tamang pananampalataya kay Kristo tungo sa kaligtasan (2 Timoteo 3:14-15)
- B. Ito ang magpapatunay at talaan na sa ating Panginoong Hesu-Kristo ay may katiyakan (1 Juan 5:11, Juan 10:28-29)
- C. Ito ay pagkaing espiritwal ng ating kaluluwa para sa araw-araw nating pangangailangan. (1 Pedro 2:2, Mateo 4:4)
- D. Ito ay magdudulot sa ating buhay ng maraming kapakinabangan. (2 Timoteo 3:16-17)
- E. Ito ay maghahatid sa atin ng kaginhawaan at mabuting kawakasan. (Juan 10:10, Josue 1:8)

II. Kaparaanan ng pag-aaral ng salita ng Diyos

2 Timoteo 2:15

- A. Alamin kung para kanino 1 Corinto 10:32
- B. Alamin ang tamang kapanahunan
- C. Alamin kung Sino ang nagsasalita

III. Mga Kaalaman patungkol sa Biblia

A. Ang Biblia ay binubuo ng animnapu't anim na aklat.

- Matandang tipan na mayroong tatlongpu't siyam ang kabuuang bilang.
- Bagong tipan na mayroong namang dalawangpu't pito ang kabuuang bilang.

B. Ito ay isinulat ng humigit sa apatnapung manunulat na may iba't ibang katayuan sa buhay ayon sa pagkasangkapan ng Panginoon.

C. Mga nilalamang bilang ng Biblia

- bilang ng letra sa Ingles: 3, 566, 480
- bilang ng salita: 810, 677
- bilang ng mga talata: 31, 175
- bilang ng mga kapitulo: 1, 189
- pinaka mahabang kapitulo: Mga awit (Psalm) 119 na binubuo ng 176 na talata. Ang gitnang kabanata at pinaka maiksi din naman ay Mga awit 117.
- pinaka maiksing talata: Juan 11:35
- pinaka mahabang talata: Esther 8:9.

PAGTATAPOS

Ugaliin natin ang laging magpagabay mula sa salita ng Diyos upang matiyak natin na sa bawat gagawin at pagpapasyahan natin ay naaayon sa Kanyang kalooban sa pamamagitan ng pagbubulay-bulay nito araw at gabi.

*Ikatlong Aralin***GAYAHIN ANG LAKAD NI KRISTO****PASIMULA**

Mula ng tayo ay kumilala sa ating Panginoong Hesu Kristo bilang ating maging Panginoon at Tagapagligtas ay kalakip nito ang pagtatalaga ng ating buhay para sa Kanyang kaluwalhatian, alinsunod sa paglakad sa Kanyang mga iniwang halimbawa sa tamang pamumuhay bilang isang mananampalataya na naglilingkod sa ating Diyos. (**Colosas 2:6**)

Mga halimbawa sa lakad ni Kristo: Mateo 10:24

- A. Ang Kanyang **Pagsunod** (Filipos 2:5-8)
- B. Ang Kanyang **Pagpapakumbaba** (Mateo 16:24, Santiago 4:10)
- C. Ang Kanyang **Pagpapasakop** (Mateo 3:13-17, Mga Gawa 2:41, 1 Corinto 11:24-25)

Magpasakop nga tayo sa mga sumusunod:

- 1. Sa ating Diyos (Santiago 4:7, Efeso 5:21)
- 2. Sa ating **Iglesia**
 - Sa kanyang **ordinansa** (Mateo 3:13-17, 1 Corinto 11:24-29)
 - Sa kanyang **disiplina** (Mateo 18:15-17)
- 3. Sa ating **Pastor** (Hebreo 13:17)
- 4. Sa ating mga **Magulang** (Efeso 6:1-3)
- 5. Sa ating **Gobyerno** (Roma 13:1-6)

D. Ang Kanyang pagmamahal (Juan 15:13, Juan 13:35)

PAGTATAPOS

Nasumpungan natin ang mga lakad ng ating Panginoong Hesus Kristo, at ito ay iniwan Niya sa atin upang maging layunin ng ating buhay na tayo ay maging katulad Niya sa tamang landas ng lakarin habang tayo ay nasa ibabaw pa ng daigdig upang maging hayag nga na tayo ay Kanyang mga tagasunod.

*Ika-Apat na Aralin***LAGING MAGING SAKSI O
MAGPATOTOO PARA KAY KRISTO**

*“Datapuwa't tatanggapin ninyo ang kapangyarihan,
pagdating sa inyo ng Espiritu Santo: at kayo'y magiging mga
saksi ko sa Jerusalem, at sa buong Judea at Samaria, at hanggang
sa kahulihulihanang hangganan ng lupa.”*

Mga Gawa 1:8

PASIMULA

Isa sa pinakadakilang tungkulin ng tunay na nakakilala sa ating Panginoong Hesu Kristo ay laging maging saksi sa katotohanan na ating nasumpungan, o magbigay ng patotoo sa iba tungkol sa tamang pananampalataya na ginawa sa krus ng kalbaryo ng ating Tagapagligtas na itinuro ng Bibliya.

Ang bawat mananampalataya ay marapat lamang na maghatid ng mga kaluluwa sa paanan ng Panginoong Hesus sa pamamagitan ng pagpapatotoo sa kaligtasan na atin ng nakamtan.

I. Mga kadahilanan ng ating pagpapatotoo:

- A. Ito ay iniutos sa atin ng Panginoong Hesus na tayo ay humayo (Marcos 16:15-16)
- B. Sapagkat mahalaga sa Diyos ang kaluluwa ng isang tao. (Lucas 15:7,10)
- C. Mayroong totoong kapahamakan sa lugar ng impyerno. (Marcos 9:44)

- D. Pinaghanda ng Panginoong Hesu Kristo ang lahat ng sumampalataya sa Kanya ng magandang lugar sa langit. (Juan 14:2)
- E. Gagantimpalaan ng Diyos ang mga nagpapatotoo para Kay Kristo. (I Corinto 3:8)

II. Mga katangian ng mga saksi na magpapatotoo

- A. Kailangang siya ay totoong naligtas na may katiyakan.
- B. Kinakailangang siya ay mayroong magandang patotoo, na lumalakad ayon sa kalooban ng Diyos.
- C. Siya ay may kahabagan at marubdob na pag-ibig sa kaluluwa.
- D. Siya ay dapat na nananalangin at nagbabasa ng bibliya upang magkroon ng kaalaman at makamtan niya ang tulong ng Banal na Espiritu.

PAGTATAPOS

Lahat tayo ay mayroong mga mahal sa buhay, kaibigan, kakilala, mga kapit bahay, at mga taong nakakasalumuha natin sa araw-araw, maaaring bukas ay huli na, kung hindi tayo magiging saksi para kay Kristo at maging sa ginawa Niya sa krus ng kalbaryo, sapagkat marami sa kanila ang hindi pa nakakakilala sa Panginoong Hesu Kristo upang maging Diyos at Tagapagligtas ng kanilang buhay. Nais tayong paalalahanan ng araling ito na mayroon tayong tungkulin at pananagutan sa mga taong ito na maaaring mapahamak dahil sa ating kapabayaan.

Ika-Limang Aralin

**ASAHAN NATIN ANG DIYOS SA
PANALANGIN**

“Sapagka't ang nangatutulog ay nangatutulog sa gabi; at ang nangaglalasing ay nangaglalasing sa gabi.”

1 Tesalonica 5:17

PASIMULA

Ang panalangin ay tuwirang ugnayan natin sa ating Ama na nasa langit, Kung tayo ay nagbabasa ng Bibliya, ang Diyos ang nangungusap sa atin, at kung tayo naman ay nananalangin, tayo ang kumakausap sa Kanya. Ang ating relasyon sa Diyos ay hindi lalago kung wala tayong tamang ugnayan sa Diyos.

Ang panalangin ay may mahahalagang bahagi; una, ay pagpupuri sa Diyos; pangalawa, ay pagpapahayag ng kasalanan at paghingi ng tawad; pangatlo ay pagpapasalamat; at ang huli ay, paghingi ng ating mga pangangailangan at karaingan.

I. Mga Oras ng Pananalangin

- A. Manalangin sa umaga, sa tanghali, at sa gabi
- B. Palagiang manalangin (Lucas 18:1)
- C. Manalangin ng walang patid

II. Saan tayo dapat manalangin (Mateo 6:6)

- A. Sa isang saradong silid

B. Sa loob ng bahay sambahan (Mateo 21:13)

C. Sa kapulungan ng Iglesia (Mga Gawa 2:42)

D. Sa lahat ng dako

III. Mga hadlang sa ating pananalangin

A. Maling pamamaraan ng pananalangin (Mateo 6:7)

- pagtawag sa diyos-diyosan
- paulit ulit
- maling motibo

B. May mga suliranin o hidwaan sa tahanan
(1 Pedro 3:7)

C. Kakulangan sa pananampalataya (Marcos 11:24)

D. Mga kasalanang hindi pa pinagsisisihan
(Santiago 4:3)

PAGTATAPOS

Ang pananalangin ay ating tungkulin at isang karapatan natin bilang anak ng Diyos na hindi natin dapat binabalewala, lalo na't tayo ang may higit na may kailangan sa Diyos, at sa pagtawag natin sa Kanya ay binigyan Niya tayo ng pagasa na Siya sasagot at magpapakita ng mga kamangha-manghang bagay na hindi pa natin nakikita sa nakalipas.

*Ika-Anim na Aralin***GALAK SA ATING PAGKAKALOOB AY
TANGKILIKIN****PASIMULA**

Ang isang tunay na mananampalataya ay nararapat lamang na sumunod, umibig, magpasalamat, at sumamba sa Diyos tanda ng kanyang binagong buhay at paglagong espiritwal, alinsunod sa kalooban ng Diyos, at isa sa mga malinaw na basehan na atin ngang nagaganap ang mga bagay na ito ay sa larangan ng masaya at tapat na pagkakaloob.

Kaya't kailangan nating maunawaan ang iba't ibang uri ng pagkakaloob na itinuro ng bibliya, hindi dahil kailangan ng Diyos ng iyong tinatangkilik, kundi matutunan mong parangalan at pagtiwalaan ang Diyos, maging mabuti kang katiwala, at higit ka pang mapagpala.

Mga uri ng kaloob at kalakip na pagpapala. (Lucas 6:38)

I. Unang Ikapu (*Tithes*)

Bunga: Takal na mabuti o tamang takal (Malakias 3:6-11)

II. Kapupunang handog (*Increase Offering*)

Bunga: Siksik (2 Cronica 31:5)

A. Kusang-loob (2 Corinto 9:6-8)

B. Kaloob ng pananampalataya (Filipos 4:19)

c. Kaloob ng may pag-ibig (2 Corinto 8:8-9)

III. Unang bunga (*Firstfruits*)

Bunga: Liglig (Kawikaan 3:9-10)

IV. Haing sakripisyo (*Sacrificial Offering*)

Bunga: Umaapaw (Juan 3:16, 2 Corinto 8:2-5)

PAGTATAPOS

Tayong lahat ay dapat na makaunawa na sadyang ang lahat ng bagay ay pagmamay-ari ng Diyos, at tayo ay Kanyang katiwala lamang, kaya't wala tayong dapat ipagdamot sa ating Panginoon lalo na't ang pagkakaloob sa Kanya ay pagbibigay lamang natin ng dahilan upang higit Niya pa tayong pagkatiwalaan sa mas malaking pagpapala, at lubos natin Siyang maparangalan at mabigyan ng tamang pagsamba.

*Ika-Pitong Aralin***ORAS NATIN AY ILAAN SA PAGTUPAD
NG HAKBANGIN NG PAGLAGO****PASIMULA**

Sa araling ito ay maunawaan natin na gamitin ng tama at maayos ang oras na patuloy na ipinagkakaloob sa atin ng Diyos upang hindi natin maaksaya ang pagkakataon sa bawat panahon ayon sa pinagkatiwala sa atin ng Panginoon. Ang mga walang kabuluhang bagay at mga gawain na makapagpapahiwalay sa atin sa kalooban ng Diyos ay dapat ng maiwaksi sa ating buhay, sa pamamagitan ng pagbibigay ng kaukulang pansin sa pagtupad ng mga hakbangin ng paglago nang sa gayon ay maging sakdal tayo sa harapan ng Diyos at makamtan natin ang nauukol na buhay para sa atin.

Mga kadahilanan kung bakit kailangan nating lumago sa ating pananampalataya:

- A. Kalooban ng Diyos na tayo ay lumago at hindi manatiling sanggol sa ating pananampalataya.
(Hebreo 5:12)
- B. Katunayan ang ating paglago na sadyang sapat at hindi nagkukulang ang biyaya ng Diyos. (2 Corinto 9:8)
- C. Kalikasan ng tunay na sumampalataya sa Panginoong Hesu Kristo ang lumago. (Efeso 2:10)
- D. Kung tayo'y lumalago ay lubusan nating maunawaan ang layunin ng Diyos sa ating buhay (Roma 8:28)

- E. Kasisiyahan ng Diyos ang mga lumalagong mananampalataya at sila ay magiging kapakinabangan upang maisakatuparan ang katwiran ng Diyos. (Roma 8:8; 1 Tesalonica 4:1)
- F. Kaluwalhatian ng ating Panginoon ngayon at magpakailanman ang siyang maihahayag dahilan sa ating paglago. (2 Pedro 3:18)

PAGTATAPOS

Na inyong samantalahin ang panahon, sapagka't ang mga araw ay masasama. Efeso 5:16

... ang oras ay hindi maaaring huminto

... ang oras ay hindi maaaring maimbak

... ang oras ay hindi maaaring pahabain

Kung kaya't oras na upang ilaan natin ang ating buhay sa pagtupad ng natatanging layunin ng ating Panginoon at Tagapagligtas na si Hesu Kristo.